



Sarajevo, 20.05.2021. godine

MEDIJIMA

### SAOPĆENJE ZA MEDIJE

#### **Održan peti sastanak Pododbora za promet, energiju, okoliš i regionalni razvoj između EU i BiH**

Peti sastanak Pododbora za promet, energiju, okoliš i regionalni razvoj između Evropske unije i Bosne i Hercegovine održan je danas putem video-konferencije.

Članovi Delegacije EU predstavili su na početku sastanka napredak u realizaciji Evropskog zelenog plana i najavili finansijsku podršku implementaciji Zelene agende za zapadni Balkan, te istakli da su pred BiH veliki izazovi kako bi se provele strukturne reforme u oblasti zaštite okoliša. Predstavnici Evropske komisije naglasili su i da je u procesu usklađivanja zakonodavstva BiH sa horizontalnim zakonodavstvom EU potreban koordiniran pristup u cijeloj državi. Bh. vlasti trebaju ubrzati postupak donošenja Odluke o imenovanju i funkcije Nacionalne kontakt tačke za BiH za provedbu konvencija o okolišu. Razmijenjene su informacije o aktivnostima svih nivoa vlasti na izradi cjelodržavne Strategije zaštite okoliša BiH i ažuriranju Strategije prilagođavanja na klimatske promjene i niskoemisionog razvoja. BiH se mora fokusirati na postupno ukidanje korištenja uglja u proizvodnji energije kako bi nastavila sa dekarbonizacijom i zelenom tranzicijom.

Evropska komisija je konstatala da je postignut ograničeni napredak u oblasti regionalnog razvoja i ponovo istakla nužnost izrade Strategije regionalnog razvoja za cijelu zemlju te jačanja administrativnih kapaciteta u smislu programiranja, provedbe i procjene fondova EU.

Također je naglašeno da će se u provođenju budućih strategija regionalnog razvoja morati osloniti na kapacitete regija da planiraju, identificiraju, pripreme i predlože relevantne projekte. Članovi dvije delegacije razmijenili su informacije o najnovijim događanjima u vezi sa planiranom izgradnjom skladišta radioaktivnog otpada na lokaciji Trgovska gora na granici sa BiH.

BiH treba nastaviti sa reformama u skladu sa Trećim energetske paketom, usvojiti zakon o električnoj energiji i plinu na državnom nivou i zakone o obnovljivoj energiji na entitetskom nivou. Komisija je pohvalila usvajanje akcionih planova transportne zajednice za ceste, cestovnu sigurnost, željeznicu i olakšavanje prevoza i pozvala vlasti u BiH da uspostave državnu agenciju za sigurnost prometa na cestama. Također, reforme u oblasti željezničkog prometa zahtijevaju formiranje jedinstvenog tijela za sigurnost i istražnog tijela. Potrebno je ojačati kadrovske kapacitete pružatelja usluga u zračnom prometu, kako bi se izbjegao rizik od problema sa sigurnosnim nadzorom.

Petim sastankom Pododbora za promet, energiju, okoliš i regionalni razvoj između Evropske unije i Bosne i Hercegovine kopredsjedavali su Mirza Hujčić, Ministarstvo vanjske trgovine i ekonomskih odnosa BiH, i Detlev Boeing, Opća uprave Evropske komisije za proširenje i politiku susjedstva. O radu Pododbora detaljnije pročitajte na: <https://www.dei.gov.ba/bs/stabilization-agreement>.